

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA IANUARI 2026

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

AUE! UA MALILIU TOA...

Alas! The mighty have fallen...



Aso Toona'i 26 Aperila 1941 - Aso Gafua 29 Ianuari 2026
(84 tausaga 8 masina 25 aso)

UA MAUMAU AUUPEGA O LE TAUA

The weapons of war have perished

O LE FAASINO UPU

1. O LE LAUGA	2
2. E SILI LE FAAMAONI	4
4. USUFONO LE TAITAIFONO, LE TOEAINA PENISIONE, O LALE IEREMIA FT	5
5. NA O AFIOGA E TULEI MAI	7
6. O LE PEROFETA MULIMULI	8
7. O LAU AFIOGA O LE SULU	13
8. O E UA MALILIU	15
9. ATA O MATAUPU LOMIA	16

O LE LAUGA

Tusi Faitau: F. Tuai: Amosa 7: 7 – 17;
F. Fou: Luka 19: 1 – 10.

Matua: Luka 19:7, “*Ua muimui uma e na iloa, ua faapea ane, ua alu atu o ia i le tagata agasala e api ai.*”

Manatu Autu: **“E le o le galuega po o le tofi, a o le tagata galue faamaoni.”**

Ua tatou molimauina i le faalogo i leitiu ma le vaai i televise, i tala mai nuu mamao, le tele o nisi o ta’ita’i o malo ua aveesea faamalosiā mai o latou tofi, po o le tagatavaleina, ia po o le faasala foi i le oti, ona o le lē faamaoni, o le faia o faiga piopio ma le lē amiotonu, i o latou tiute ma a latou galuega fai. Ua tatou masani foi i le faatāua o galuega po o tofi, nai lo le tagata galue. O galuega e pei o le Fomai, Loia, Faifeau, Matai, Faipule, Faiaoga, Pule Aoga po o le Pule i nisi Matagaluega, ma isi galuega faapena. E pei o nisi ia o galuega e tāua tele ai le vaai lautele a o tatou tagata i Samoa nei. Tatou te fa’aaloaloga tele i latou ua tofia i ia galuega. A e ta’u mai loa o se *ave taxi*, po o se *tagata kuka*, *fai maumaga*, *ao otaota*, *faatau tauaga pe faatau sea*, ona pei lea tatou te vaai maua o le tagata i lana galuega. Ua fua le maua o le tagata i lana galuega. Ua fua le faatāuina ma le fa’aaloaloga o le tagata i lana galuega.

Peitai, o tagata e galulue faamaoni, po o le a lava le ituaiga galuega, pe maua o le tagata i lana galuega, o tagata na e tatau ona tatou faatau ma fa’aaloaloga, ma

ave i ai le faamuamua. Auā o le a le aogā e maua o le galuega, a e le faamaoni? O le a le aogā e maua o le tofi, a e le amiotonu? O le a le aogā o le tele o faailoga ma le ta’u, a e pi’opi’o ma ola pepelo, e gaoi, e faamaualuga ma manatu faapito? Po o le a lava lou tofi, ma so’u tiute ua valaauina ai tatou, tatou te galulue ai, a e afai lava tatou te le faamaoni, e leai se aogā, a o i tatou lava o tagata agasala. Po o le a le maua o le tagata o se tofiga, ae afai e le faamaoni ma lē amiotonu, e sili mamao ai le faamaoni o le tagata faifaatoaga ma le tagata o loo aumoulumoulu i le sami e fai lona faiva, ona o le alofa moni, ma le tautua matavela i Aiga, o le nuu ma le Ekalesia.

I le Tusi sa faitauina mai le Feagaiga Tuai, o loo atagia ai le lē faamaoni o Amasia, e peiseai sa evaeva foi Amasia i lana galuega, o le Ositaulaga i tupua, o se galuega e tofogi lelei, a o le faalavelave e le faamaoni Amasia, e piopio ma ola pepelo, ua fia ola ffilemu Amasia, a e mana’o e maua le taui tele. O le ala lea na valaauina ai Amosa, o le tagata o sa Iutā i le itu i saute, e alu se’i ave ma momoli le finagalo o le Atua i le malo i Matu po o Isaraelu. Ua fetalai le Atua ia Amosa, “*Faauta, ua ou tuu se fua faatautau i totonu o lo’u nuu o Isaraelu, ou te le toe sopoia lava. E faatafuna’iina mea maua o Isaraelu, e faatafuna’iina foi malumalu o Isaraelu, ou te tulai atu ma le pelu i le aiga o Ierepoamo.*”

Ai lava o le mea tonu lea, ua sau le moa folau, vivini i totonu o le fale o le moa fanua. Aisea? Aisea ua sau mamao ai le tagata mai Saute, malomaloā i Matu? A o Matu ma Saute, e ui e eseese faigamalo, a o Isaraelu e tasi? A o Isaraelu foi lea e sapi ma fai mai, na o i latou a ma le Atua, na o i latou le nuu filifilia o le Atua. A o fea la o i ai perofeta i le itu i Matu?

O le tali, e toatele perofeta, a o le faalavelave ua le maua ia i latou se tagata faamaoni, e pei o Amasia. Ua na o tagata ua sapi i tofi ma mamalu, a e aunoa ma se faamaoni. O le ala lea na valaauina ai e le Atua o Amosa, le tagata mai Sa Iuta. A o Amosa e le se perofeta, e le o se atalii foi o se perofeta, a o ia ua na o se fagamanu ma le galue sukamoru, a e o lona faamaoni, ua filifilia ma tofia ai o ia e le Atua, e ave ma perofeta. E tāua i le Atua le tagata galue faamaoni, a e lē o le ta’u po o le tofi.

E tuufaafegai la Amosa ma le tagata puupuu saasaa o Sakaio, a e peisea’i e aupaga lelei Amasia ma Sakaio lea e ta’ua i le molimau a Luka i le Feagaiga Fou. O Sakaio, o se tagata Iutaia, ua seei foi paia ma mamalu faalelailagi, auā sa tofia o ia e le Malo

o Roma, e fai ma pule po o faaululuga o le Matagaluega o Lafoga i le aai o Ieriko. O se galuega po o se tofi, e matua faigofie tele ona tofotofoina ai le faamaoni ma le amiotonu a le tagata. E faigofie tele ona pa'ū atu ai le tagata i le vaivaiga foi lea o le te'i a ua tamaoaiga fua, i le afu o isi tagata, po o le gaoi. E pei o le natura lea o lea ituaiga galuega, tagata ia ua ta'ua o Ao Lafoga po o Telona. O ia ituaiga vaivaiga faaletagata, e le na o Sakaio sa maua ai, a e sa taatele tele i ia ona po.

O le ala foi lea sa inosia tele ai i latou ia e tagata, aemaise lava i le au faafiaamiotonu o Iutaia, o taitai o le Lotu Iutaia, o le au faresaio, ma le au tusiupu, ona o faiga le amiotonu a i latou ia, o le au ao lafoga po o telona, ma sa ta'ua ai i latou o tagata agasala. O le taimi tonu lea, na afea ai e Iesu le aai lea o Ieriko, a o aga atu Iesu i lana malaga mulimuli i Ierusalem, i le taua luga ina o lana galuega faaola. O Ieriko e le gata o se aai sa ogatotonu i ai fefaatauaiga i na ona po, a o se nuu taua foi, auā sa tupuga mai ai le toatele o ositaulaga.

E ui i lea, sa silafia lelei lava e Iesu, e toatele foi le au fia faaolaina i Ieriko. E toatele foi tagata Ieriko, e umia tofi ma galuega mauaululuga, e na o le evaeva ma sapi i mamalu, a e le galulue faamaoni, o tagata tonu ia ta'u agasalaina, ua fia vaai ma fia mafuta i ai Iesu ina ia faaolaina, i nai toe taimi o lana galuega. O tagata ia, sa afio mai ai Iesu i le lalolagi, e saili ma faaola.

E 2 lava ni sasi matuiā o Taitai o le Lotu Iutaia, po o taitai Isaraelu, o loo atagia i le tala lenei. **Muamua**, sa manatu i latou, e na o tagata amio lelei ma tagata amiotonu e pei o i latou, na afio mai i ai Iesu e fia mafuta i ai.

Lona Lua, ua galo ia i latou, o i latou foi isi au eva lea e i ai, o i latou foi isi tagata agasala, tagata le faamaoni i lo latou valaauina. O tagata ia, o loo fetalai ai foi Iesu e tusa ma nisi molimau a le aufaieva gelia. *“Ua latou saisai avega mamafa ma le avegātā i ua o tagata, a e latou te le mafafai ona faagaioi i ai so latou tamatamailima...ua latou falautele i a latou filateri, ma faatele i tuupa'ō o latou ofu...Latou te fiafia i le mea sili e taoto ai i faiga'ai, ma nofoa sili i nunako, ina ia alofaina i latou e tagata.”* Mata.23: 4 – 7.

O itu tetele ia e lua sa sipa ai le lamaga i taitai o Isaraelu, faapea taitai o le Lotu Iutaia. O le ala foi lea na latou muimui ai, ina ua valaau Iesu ia Sakaio, **e tatau ona ia nofo i lona fale**. Ua latou fai ane, *“Ua alu atu o ia i le tagata agasala e api ai.”*

E faapea lava foi i le soifuaga galulue, o loo outou soifua ma o matou ola ai nei. E lelei tele le tatou tusitusi lima i o ma o, a e faigata tele ona tatou tusitusi ifo ia i tatou lava. Faatoa tusi mai lava lou aao ia te oe, ma lo'u lima ia te a'u, pe afai o ni mea lelei; a e a leaga loa, e na o le tusi lava i i ma o. A e ao lava ina tatou lagonaina lo tatou faatauvaa, lo tatou lē aūma i luma o le Atua. Auā tatou te lē o lava ma ni o tatou lelei, ma ni a tatou amiotonu i luma o le Atua. Po o le a lava sou lelei ma sa'u amiotonu o i ai, o le a se mauauluga o lou tofi o loo e i ai, o le a foi se masausau o lou faamaoni i ou tiute o i ai, e ao a ona tatou lagona pea le loto faamaulalo ma le faatauvaa, ma faapea atu ai i le Atua, o i tatou lava o tagata le atoatoa, o i tatou o tagata le faamaoni ma le agasala i ona luma.

O se tasi o itu tāua tele o lenei tala, o le eseese o Sakaio ma taitai o Iutaia. O Sakaio o le tagata lē faamaoni, a e sa naunau e feiloai ia Iesu, ina ia suia lona tagata lē faamaoni, e avea ma tagata faamaoni; ia suia lona tagata tuai, e avea ma tagata fou. A o taitai o Iutaia, ua faafia ona feiloai ma Iesu, ma fetalai tuusa'o i ai Iesu i lo latou le faamaoni, a e pei o papa tū o latou mafaufau, o loo taofiofi mamau pea ma tausisi i lo latou faafiaamiotonu.

A o le afio mai o Iesu i Ieriko, na le toe manatu ai lava Sakaio i sona tulaga taualoa i lana galuega, sa ia le toe kea ai i ni ona mamalu ma ni ona paia, a e fai mai ua momo'e i le atoa ua milo faatasi ma tagata lautele, ua su'e solo se vaega mauauluga na te iloa lelei atu ai Iesu, auā o ia o le tagata puupuu ma saasaa, seia oo ane i le laau, e pei o se tamaitiiti. O le a'e a le tagata, ua leva ona fia faaolaina lona agaga. O le tagata ua galala moni lona agaga i le fia mafuta ia Iesu. E le'i mafai e le mafafia o lau o le laau ma ona lālā, ona punitia mata fia vaai o Sakaio ia Iesu. A e ina ua vaai tino Sakaio ia Iesu, aemaise o lana fetalai ia te ia, fai mai Sakaio, *“Faauta le Alii e, o le a ou vaeluaina atu a'u mea i e matitiva, afai foi ua tiga se tasi i lo'u tu'ua'i ane, ou te tau ai e taifa.”* O se malamalama ese ua taia ai ma faamalamalamaina ai le olaga pogisa sa i ai Sakaio. Le tagata sa ola manatu faapito ma faaputu 'oa mo ia lava, a o lea ua avea ma tagata ua iloa fa'aaoga ma faasoa atu lona tamaoaiga i isi ona uso a tagata. O se tulaga ua matua atagia ai, le o faatasi o le futia ma le umele, i le faamoemoe mauauluga o le Atua i le tagata, ma lona la lava Alofa Tutunoa. *“Auā ua sau le Atalii o le tagata e saili ma faaola i le na leiloa.”* Se mea ina matagofie, o le tagata agasala a

e ona talia fiafia Keriso i lona agaga, auā o mea sa vaapiapi ai lona olaga, lea ua i ai avanoa lautetele, o mea sa faigata, o lea ua faigofie.

O le valaauina e Iesu o Sakaio, o le valaau lava lea faaleoleo mamoe i le mamoe ua fesea'i solo i le vaopuanea o le agasala. O se avanoa fa'auro mo le mamoe ua se ma le tagata ua leiloa, auā e le faailoga tagata le alofa o le Atua. O le alofa e aapa atu i soo se tagata o fia faaolaina.

O se fafagu ma se faamanatu taua lea i tagata luitaia, i le au faresaio ma le au tusiupu, i latou ia o loo manatu e faapumoomoo mona o i latou le faaolataga. A o le faaolataga e ala i le alofa lautele o le Atua, e mo tagata uma i soo se tulaga pe taualoa pe faatauva, pe mativa pe mauoa, i soo se lanu ma soo se gagana. O le faamoemoe lea o le Keriso mo le lalolagi tagata ua matua leiloa atoatoa mai le aiga o le Atua, ua se ese mai le upu moni, ua sesē ese mai le ala o le ola faapaiaina, ua sese ese mai le nofoaga o le olioli moni o le fanau a le Atua.

Le Ekalesia e, le fanau a le Atua i Samoa nei ma atunuu e mamao, o le feau foi lea o le Talalelei mo i tatou uma. E eseese galuega, e eseese foi tagata e tofia i ai. A o le mea e sili ona taua, ia faatau le ola auauna, tautua ma galue faamaoni, a e le o le tofi ma galuega. **'Aua le amoina le valaauina, po o le tofi, po o le ta'u, po o le suafa, e leai se aogā, e iuvale ma faalumaina lena amio ma lena uiga.** A e faatau le galue, tautua ma auauna ma le faamaoni i le Atua. Ia faatau le faamaoni, i soo se tofi ma soo se galuega ua valaauina i ai i tatou e le Atua.

O le tagata lē faamaoni, o le tagata ua leiloa i le agasala, e leai a sona eseese ma le tagata malaga ua ese le itulagi ua sesē i ai. O le tagata ua leiloa lona faamoemoe, ua leiloa ona foliga paia na fai ai e le Atua. Ua ave ma mea ula, ua leai sona matagofie, ma ua leai sona taua.

O lo tatou agaga naunau moni e fia saili ia Iesu, e mafai ona taitaiina ai i tatou i le faaolaina. O le agaga naunau moni e faigofie ai ona a'ea mea faigata, ona o le fia mafuta moni ia Iesu. O se lu'i mo i tatou le Au Kerisiano, afai ua faaolaina oe, ia fai sou sao, ma ia fa'avanoa lou tagata, o lou taimi, tatou te saili ai mo le faaolaina o tagata ua leiloloa i le agasala. Ia tatou mulimuli i le ala o le alofa lea na savali ai Iesu Keriso.

O le afio mai o le Keriso, na afio mai e laveai le lalolagi ua leiloa i le agasala. Ua finagalo le Alo o le Atua e toe faaola mai ma toe faafoi mai le tagata

agasala i le mafutaga mafanafana ma le Atua. Na Ia saunia ai e Ia, lona lava tagata e afio mai ma faailoa mai i le lalolagi, e ala i lona liutino tagata. Sa soifua ma puapuagatia, sa maluu ma toetu manumalo, sa toe afio a'e i le lagi, a e tuua ai le galuega o le faaolataga i lona tulaga atoatoa ma le matagofie – Le Talalelei o le Faaolataga ma le Alofa Tunoa o le Atua. ONA O IESU, AMENE.

Saunia Tavita Kirisimasi Sala'a Fiti FS,
EFKS Avao, Pulega Gaga'emauga,
Matagaluega ITU O TANE.

E sili lava le faamaoni

“O lē savali i le amiotonu, ua savali ma le saogalemu o ia; a o lē faapi'opi'o ona ala, e fa'aalia o ia.” Faata. 10.

Na alu le tasi fafine e fai le faatau o le tausiga o le po, ona afe lea i le fale o manufasi e faatau se moa. Ina ua ia fesili atu i le alii faatauolaga mo le taailepaepae aupito lapo'a o i ai, na tago ifo le alii faatauolaga i totonu o le pusa, ma si'i a'e le moa e tasi sa totoe ai, ma tuu i luga o le fua. “Tamaitai, e 4 pauna le mamafa o le moa lea,” na fai ane ai le faatauolaga.

Na vaai atu le fafine, ona toe mafaufau teisi lea ma fai atu, “Ou te lē mautinoa pe lava le moa lena. E i ai se isi moa e lapo'a atu?” Ona tago lea o le faatauolaga ua toe tuu i totonu o le pusa le moa, ua faatagā sa'eu solo ona lima, ma si'i a'e i luga le moa lava lea e tasi. Ua na tuu i luga o le fua, ma oomi ai ona tamatamailima ina ia faamamafa, ma fai atu, “O le moa lea e 6 pauna le mamafa.” Na fiafia le fafine, peitai na ia toe faatali teisi ma toe mafaufau faalua. “Ou te lē mautinoa lava, pe ua lava le moa lena. Ia e malie, o le a ave uma moa e lua; ia affi faatasi mai faamolemole.” E lē taumateina le fememea'i o le alii faatauolaga, ae ua leai sona alofaga ina ua maua taitaia lona lē faamaoni ma lona pepelo.

E sili lava le faamaoni, e le gata i le lalolagi ma le olaga lena, a o le olaga foi o mulimuli mai. O loo fai mai le Tusi Paia faasino i lena olaga, “*O lē savali i le amiotonu, ua savali ma le saogalemu o ia; a o lē faapi'opi'o ona ala, e fa'aalia o ia (e maua ma faasalaina).*” A o le molimau a le Tusi Paia faasino i le olaga o mulimuli mai, “*O lena, aua tou te faamasino i se tasi mea a o le'i oo mai ona po, seia afio mai le Alii, o lē na te faamalamalamaina mea lilo o i le pouliuli, ma fa'aalia filifiliga o loto; e i ai ona taitasi ma ta'uleleia e le Atua.*” I Kori. 4.

F. Tolua

USUFONO LĒ SA TA'ITA'IFONO FONO TELE EFKS

“E moni e mulimuli mai ia te a’u le agalelei ma le alofa i aso uma o lo’u ola; ou te nofo foi i le fale o le Alii i aso e tele lava.” Salamo 23:6

O le masina nei na lagona ai le leo i Rama, ina ua oo mai le tala faanoanoa i le maliu ai o se tasi o Tama o le Ekalesia na tula’i mai i le foe, e ala i le tofiga o le Taitaifono o le Fono Tele a le Ekalesia (O le Fono Tele, o le Fono Sili lea o le Ekalesia, e tusa ma lona Faavae; o le Laulau o le Fono Tele, o le Laulau a Fono Sili foi lea, nai lo isi Komiti uma ma a latou Laulau-a-fono). O le susuga i le toeaina ia Lale Ieremia FT o le Toeaina Penisione o le EFKS Takanini, Pulega Manukau Sasa’e, Matagaluega Manukau. Na soifua mai o ia i le Aso Toonai, 26 Aperila 1941, a e na faamanavaina e le Atua ana feau i le Aso Gafua, 19 Ianuari 2026. Ua atoa ai le 84 tausaga, 8 masina ma aso e 25 o lona soifua.

O ona tua’a: o lona tama o Rev. Ieremia Ieremia, o Vaie’e ma Matautu Falealili; a o lona tina o Peaario Simanu Ieremia o Saolufata ma Sapunaoa. O ona matua fai o Sydney Gray o Vaimoso & Catherine Elizabeth Gray - Pe’a o Sinamoga. Na faaipoipo atu ia Tifilelei Moreli Alama Fumataga (Lalomanu & Sapapalii) i le aso 25 Aperila 1970, i le Kolisi Faafaifeau i Malua (na maliu Tifilelei i le 2011). E to’a lima o la’ua alo - Namulauulu Tuiloma Alama Ieremia (lauiloa i taaloga lakapi/All Blacks), Lalau Sydney Ieremia, Li’omatua Dr. Wanda Ieremia-Allan (na fanaua Litara Ieremia-Allan sa avea ma Tausala o Samoa 2024-25, & Tausala Pasefika 2025-26), Merina Flora Ieremia-Apelu (tausinuu EFKS Onehunga), ma Tanya Lagaali Ieremia. E i ai foi lana fanau fai. O le aofa’i o i latou na tutupu mai ia te ia e toa 19.

O le talaaga otooto o lona soifua:

1947-1952:	A’oga Tulaga Lua, Poutasi Falealili
1953-1957:	Kolisi o Samoa
1961-1964:	A’otauina Kolisi Faafaifeau Malua
1965:	Auckland Bible School
1965-1968:	Pacific Theological College-B.Div.
1969-1970:	Malua Theo College, WCC
1970:	Westminster College, University of Cambridge, England
1971-1973:	Faia’oga Kolisi Faafaifeau Malua
1973-1980:	University of Auckland, University of Cambridge - BA, BEd

1980-1983:	Pule A’oga, Kolisi Leulumoea Fou Sui Komiti o A’oga
1983-1988:	Failautusi Aoao, EFKS
1990-2012:	Tausi Nuu, EFKS Fasitoo-tai Komiti Tupe, Matagaluega Aana Failautusi Komiti Tupe
2000-2010:	Taitaifono Komiti Tupe
2010:	Faifeau Toeaina, Pulega Alofi
2010-2011:	Sui Taitaifono, Fono Tele
2011-2012:	Taitaifono, Fono Tele, EFKS
2012:	Penisione
2012-2026:	Toeaina Penisione, EFKS Takanini.

O le aso lava na maliu ai le Toeaina Penisione, na amata faagasolo ai ona sauniga mamalu faatasi ma lana fanau, o aiga ma uo, aemaise lana Ekalesia sa tautua ai i le Atua, ma auala atu ai lana osiga taulaga i lona Alii o Iesu Keriso, le Ekalesia Faapotopotoga Kerisiano Samoa i Takanini, Matagaluega Manukau i Niu Sila. O la latou toe sauniga i le Aso Sa mulimuli, 25 Ianuari 2026 na faia lava i le malumalu o le EFKS Takanini, na ta’ita’i ai le A’oa’o Faai’uaso o le Kolisi Faafaifeau Malua, susuga Iafeta Tafuna’ina. A o le Aso Lua, 27 Ianuari, na faia ai le sauniga mulimuli i Aotearoa, a e le’i tuuvaa mai mo Samoa.

Na taunuu mai lona tino maliu i Faleolo, Samoa i le Aso Tofi 29 Ianuari 2026, o faatali atu e le Laulau a le Fono Tele, le Laulau a le Komiti Au Toeaina, ma le toatele o Toeaina ma Faifeau ma Faletua; ona faia lea o le Tatalo faafetai e le susuga Falesefulu Falesefulu FS, o le faafeagaiga taulagi o le EFKS Sinamoga. Ona molimoli atu lea o lona sa, ma afe i Malua na faatali mai ai e le faaitualalua a A’oa’o, mo le Sauniga Faapitoa mo le Toeaina sa fai ma Taitaifono o le Fono Tele. Sa ta’ita’i lea sauniga e le Taitaifono Komiti Au Toeaina, susuga Asotasi Time FT, o le Tusi Paia na faitauina e le Failautusi Komiti Au Toeaina susuga Amuia Seuala FT, o Tatalo na taitaiina e le Sui Taitaifono Fono Tele, susuga Palemia Tauiliili Reupena FT, a o le Lauga na saunia e le Taitaifono Fono Tele, susuga Enefatu Lesa FT. Ona molimoli atu ai lea o lona tino maliu i le fagaena o Letoa Sefo Pa’u i Tafaigata, e mapu ma malolo ai, ma faatali ai ona toe sauniga.

Na faia le Sauniga faaleaiga i le Aso Toonai, 31 Ianuari i le malumalu o le EFKS Sinamoga. Na molimauina ai le soifua o le Toeaina, a o la latou

mafutaga ma lona aiga, e lana fanau, o ona uso ma tuafafine, faapea ana uo mamae ma paaga i le soifuaga nei. O se meaalofo a le Atua, e tulaga ese foi lona soifuaga i ona uiga tausaaafia, e alofa faamaoni i lona aiga. Na ta'ita'i le Toeaina Penisione susuga Paul Gray FT. O talosaga na saunia e le faafeagaiga EFKS Ranui, susuga Filemoni Tuigamala FS, a o le faitauina o le Tusi Paia ma le Lauga na saunia e le faafeagaiga EFKS Sinamoga susuga Falesefulu Falesefulu FS. Na mae'a le sauniga ma le tali fa'aaloalo a aiganalua, ona toe momoli atu lea e le susuga Falesefulu FS, o le sa o le Toeaina Penisione i Tafaigata e malolo ai. O le afiafi o le Aso Gafua, 2 Fepuari 2026 i le itula 4pm na toe momoli mai ai o ia i lona aiga i Sinamoga, na fai ai le sauniga lotu, ma tofa ai mo malologa o le po.

O Toe Sauniga o le Toeaina Penisione, le sa fai ma Taitaifono Fono Tele o le Ekalesia Faapotopotoga Kerisiano Samoa, susuga Lale Ieremia FT, sa faia i le Aso Lua, 3 Fepuari 2026 i le malumalu EFKS Sinamoga, Faleata. Na ta'ita'i le Toeaina o le Pulega Faleata Sasa'e, le Komiti Faatonu Matagaluega Faleata, susuga Misipalauni Faatau FT. O le Toeaina o le Pulega Faleata Sisifo, susuga Iosefa Afutiti FT na momoliina atu le sa o le Toeaina i totonu o le malumalu mo ona toe sauniga, o faafeao ma mulimuli atu ai lana fanau pele ma aiga faanoanoa. E umi se taimi o faasolo atu alofaaga ma pelega o aiga, uo ma le Ekalesia, e ala i teu fugalaau ma pale felanua'i. Na maualuga le auai o le mamalu o le Malo, i le afioga i le Ao mamalu o le Malo ma le Masiofo, faapea nisi o le Palemene o Samoa.

O le Tusi Paia na faitauina e le Toeaina o le Pulega Manukau Sasa'e, le Faafeagaiga taulagi a le EFKS Manurewa, susuga Talia Tapaleao FT; a o Talosaga sa ta'ita'iina e le Toeaina Komiti Faatonu o le Matagaluega Falealili Saaga Siumu, le Faafeagaiga EFKS Sapo'e susuga Tunumoso Soliola Iosia FT, le sa avea foi ma Taitaifono Fono Tele. O le Lauga na saunia e le Faafeagaiga EFKS Hamilton, le Toeaina o le Pulega Waikato a o le Komiti Faatonu o le Matagaluega Manukau, susuga Anatu Reupena FT.

O molimau i le soifua auauna o le Toeaina Penisione i lona aiga aemaise i le EFKS:

Tuiloma Namulauulu Alama Ieremia (sui o fanau)
Iupelitolu Ieremia FS (Faifeau Penisione. (uso)
Amuia Seuala FT (Failautusi Komiti Au Toeaina)
Dr. Taipisia Leilua FS (Failautusi Aoao EFKS)

Tusani Iosefatu Reti (Sui o Aiga)

Tuiloma Leleua Faitasi Gae'e AF (aulotu Sinamoga)
Palemia Lafolafo FS (Faafeagaiga EFKS Takanini)
Falesefulu Falesefulu FS (Feagaiga EFKS Sinamoga).

O le molimau a le susuga Falesefulu e tusa ma faamaumaua i le Api o le Galuega EFKS Sinamoga na tusia e le susuga Iupeli Poloie FT (ua malieu), o Lale na tulaga muamua i A'oga a le Faifeau, mai lava i le vasega 1 e oo i le vasega 6. Na molimau le uso faifeau penisione ia Iupeli FS, o Lale sa malosilona fautua i ta'ita'i o le malo mo se manuia o le atunuu - sa ave ana tusi faufautua ia Tuilaepa ma Fiamē a o avea ma Palemia. A o le aotelega o molimau, o Lale o se Tama e mamao lana vaai i luma, mo le manuia o lona aiga ma lana Ekalesia. E galue mae'ae'a, e loloto lona faatuatua, e mamao lana tofa, e faamaoni ma mata'u i le Atua, e alofa moni ma loto maulalo i le va ma isi. Amuia lea auauna, o maua mai e lona Alii o loo faapea ona ia fai.

Na faai'u ona toe sauniga i le lafoina o le lefulefu ma tuuina ifo lona tino i lona tuugamau, i lona aiga i Sinamoga. O le susuga Falesefulu Falesefulu FS na ta'ita'iina le sauniga faai'u lenei, na faatofa atu ai i le susuga i le Tama Toeaina Penisione, i Pese Faamavae a le au kerisiano, *“Talofa uso e, tofaina oe; Ua sau le itupo e malolo; E ala oe pe a mavae le po, Tofa Tofa Tofa.”* *“E tumau le faamoemoe ia Iesu, ta te toe feiloa'i ai.”*

“Le auauna lelei e, ma le faamaoni...ou te tofia oe e pule i mea e tele... ulufale mai ia i le fiafia o lou Alii..” O fetalaiaga faamafanafana a lo tatou Alii o Iesu, *“Aua le atuatuvaletou loto, ia faatuatua i le Atua, faatuatua mai foi ia te a'u”* *“Ou te le tuua outou o matuaoti, ou te sau ia te outou.”* *“Amuia e faanoanoa; aua e faamafanafanaina i latou.”* O le mea ou te i ai a'u, e i ai foi la'u auauna.

Na faai'u taualumaga o le aso fiafia o le afioga Taitaifono Fono Tele, susuga i le Toeaina Lale Ieremia FT, i le taumafataga matagofie ma fa'aaloaloga maualuluga sa fai i le maota o le galuega i Sinamoga, na faliu ma faafao i ai aao o le paia o le aiga alii, o susuga Toeaina, Faafeagaiga ma Faletua, o tamalii ma faleupolu, aemaise o alo ma fanau, lea sa tu totoo ai le fetalaiaga ia Namulauulu. *Ua i'u ona sauniga i le viiga o le Atua.*

Saunia i le fesoasoani mai o susuga Falesefulu Falesefulu FS, EFKS Sinamoga & Palemia Lafolafo FS, EFKS Takanini.

NA O AFIGA E TULEI MAI FOFEGA O LE ALII...

A i ai le loto, e i ai le auala e fai ai

“³⁵ O le mea lea aua le lafoai ai lo outou loto tele, auā ua i ai le tau i tele. ³⁶ Auā ua aoga ia te outou le onosai, ina ia maua e outou le mea na folafolaina, pe a uma ona faia e outou le finagalo o le Atua.” Eperu 10.

I le vaitau o le 1950s, na faate’a ai se alii seila talavou e igoa ia Euini Rosenipeka mai le Vaegaau o le Gataifale a Amerika, ina ua maua i le kanesa – o aiaiga masani a le vaega’au. O le leai o se galuega na taia ai o ia, peitai na ia naunau ina ia toe maua lona maloloina aemaise o lana galuega. O lona faatuatua ma lona naunau tauivi na ia finau ai e faatoilalo le ma’i ua na pulea lona tino. E i ai le taimi na ta’u atu ai toe o ni nai vaiaso o totoe o lona ola, peitai o lona finau pea na i’u ai ina togafitia lona kanesa. Na amata loa ona finau Euini ia avea o ia ma ofisa o le fuāvaa. Ui i lea, sa ia iloa mulimuli ane e lē mafai ona avea se tagata sa maua i le kanesa, e fai ma ofisa o le neivi.

O ana uo uma ma isi tagata na latou fai atu, “E sili ona tuu lau mataupu. Ai se’i loga e fai se tulafono a le Konekeresi mo oe ona faato’a mafai lea ma faataunuu lau miti.” O iina na maua ai lana auala – o le a ia finauina se iloilogia o le Faavae i le Konekeresi a Amerika! Ina ua uma masina o lona taumafai e tu’itu’i atu i soo se faitoto’a, ma uia auala faaletulafono o fesootaiga ma faalauiloa, na i’u lava ina saina e le Peresetene Amerika o Turumane le pili faapitoa o le tulafono, e faataga ai Euini e toe galue i le Fuavaa Manuao o le Taua. Ma, na i’u lava ina avea o ia ma Ofisa maua luga, o se atimalala o le Vaegaau Lona Fitu o le Fuamanuao a Amerika! O le tala moni lava lenei. Ma e pei ona sa tupu i le aliivaa o le fua a Amerika, e mafaia foi e soo se tagata faatuatua.

O le muagagana, ‘O le mea e i ai le loto, e i ai le auala e maua ai.’ Pe afai o ia te oe le faatuatua e le fo’i, ma o lou loto e fetau lelei ma le finagalo o le Atua, o mea uma lava e te manatu i ai, e mafaia uma lava. *“Aua le lafoai ai lo outou loto tele, auā ua i ai le tau i tele. ³⁶ Auā ua aoga ia te outou le onosai, ina ia maua e outou le mea na folafolaina, pe a uma ona faia e outou le finagalo o le Atua.”*

Tatalo mo se asiga mai le lagi

“⁴¹ E! le fia masae o le lagi ia te oe, ma ia e afio ifo, ina ia tafe ifo mauga i ou luma.” Isa 64.

Na fetalai Iesu i ona soo ina o le a tuua lenei lalolagi a e toe afio i le lagi, *“⁴⁹ Faauta foi, ou te auina mai ia te outou le na folafolaina e lo’u Tama; a ia outou nonofo i le aai, seia faaofuina outou i le mana mai luga.”* Luka 24. O le avea ai o oe o se atalii/afafine faaolaina o le Atua, o loo afio ai le Agaga Paia i totonu o lou loto (Roma 8:9). Peitai o le folafolaga o ta’ua i luga, e ta’u mai ai e mafai foi e lenei Agaga Paia ona nofo i ou luga ma avatu le malosia ia te oe.

Sa faapefea ona tali atu le au soo i lenei folafolaga? *“¹⁴ Ua finafinau pea i latou nei uma lava ma le loto gatasi i le tatalo ma le aiai”* Galu 1. Fai mai le alii tusitala o Larry Sparks, ‘Ua umi tele ona tuulafoa’i e le ekalesia i sisifo le aganuu o le tatalo, ua faamatalaina i le leai o ni faai’uga vaaia.’ Ona ia aumaia lea o le metotia lenei, mo se asiasiga mai le lagi: “Toe iloilo lelei folafolaga a le Atua mo le liligiina ifo o le Agaga Paia. Ia matua’i tagofia ma umia ia mau nei folafolaga uma. Ma ia auai i talotaloga e loloto, e faifai pea, e finau seia oo ina tino moni mai ma le toefuataiina. O mea moni na sa fai e le au soo.”

E masani ona tatou faia le mea sesē i le manatu faapea, o le liligiina ifo o le Agaga Paia ua uma ona faamauiina i le kalena a le lagi ona aso e faataunuu ai. O le tasi o folafolaga a le Atua ia i tatou e faapea: *“¹⁷ O ona aso e tatau ai, o loo faapea mai le Atua, e i’u ina ou liligi ifo ai lo’u Agaga i luga o tagata uma lava;”* Galu 2. O aso uma lava e le’i maua ai e tagata uma le liligi ifo o lenei Agaga Paia, e tatau ai ona tatou tatalo ma saga fa’aauau e tatalo pea, ma faapea atu, *E! le fia masae o le lagi ia te oe, ma ia e afio ifo, ina ia tafe ifo mauga i ou luma.* E te faapea ane, Se a se mea ou te faia? Fai le mea na fai e le au soo: Finafinau faatasi i le tatalo ma le aiai i aso fai soo. Amata le aso ma faai’u le aso i le tatalo mo se asiga mai le lagi, ma ia manuia talosaga molia.

(F. Tolua)

O LE PEROFETA MULIMULI

(O le tala faafagogo faaSamoaia mai le tusi 'The Last Oracle' tusia e James Rollins)

Ua ave le tama i ona lima, ona ulu atu lea o Monike ma i latou i totonu o le fale teu oa. O le pusa e faatonutonu ai agafesootai sa pupusa mai faaleagaina ogaoga ma le nuti lili'i. Na taatitia pusa ki o komepiuta ua taei. O tioata sa nuti pe a savalia. Na ta'ei mea uma, vagana se laina o faailoata i le puipui. Na faasino atu Monike i le faailoata ogatotonu, ua na maitauina le potu. O le ogatotonu o Gaioiga Saturine. Pau o lea, o le taimi nei ua sisina ifo le vai uliuli e pei se vaitafe, mai le tutulu sa i le taualuga ma sosolo ifo i se paipa agai i le fola.

"O lea ua amata," na ia fai atu ai i le leo gaogao'i'i. "Ua tatou tuai tele."

I se isi faailoata, na iloa atu ai e Monike le fale maina na ia tuua ai Konesetatino ma isi tamaiti. O tamaiti sa fola solo i faaputuga felavasa'i solo. Sa nunumi tele le vaaiga na le iloa ai poo ola tamaiti pe leai. Pe mata ua oo atu i ai le kasa oona?

Na totego a'e lagona o le atuatuvaale i totonu o ia.

A o se'i ane e Karai se telefoni, na faatau pupula atu Monike i le isi vaega: Koualasaki ma Rosauro. Na taumafai Monike e saili se faailoga na te maitauina ai se tasi. E leai se mea. O ai nei tagata? Afai o ni ana uo, pe le tataua ona latou pu'ea ni tali mai ia te ia? A o ia iloilo pea isi tagata, na pa'i atu le lima o Piota i le faailoata sa ogatotonu ma tuu ai lona alofilima i ona luga.

"O le a lana mea o loo fai?" na fesili ai Karai a o pipii le telefoni i lona taliga.

Na liliu atu Monike. "Ia Piota?"

Sa faatau pupula ma le loloto le tama i ata o i luga o le faailoata.

Na tautala mai Koualasaki i le itu agavale. "Sole, o lea ua minoi le nofoaafi lea iinei!"

Na tepa atu Monike. Na minoi lemu atu le nofoaafi i lona auala, o feemo ai uila eletise. Mata o loo i ai pea le eletise i le ana, e le o mafai ona latou pulea.

"O fai e le tamitiiti le mea lena?" na fesili Koualasaki.

"O lona faaminoini le nofoaafi i lona mafaufau?"

Na taofi le manava a Monike, ona feula malie mai lea i fafo. "E leai," na ia fai atu a o faatau pupula atu i le nofoaafi o solomuli, ua faafuase'i ona ia toe manatua. "O loo i ai se isi tagata o loo i ai."

"O ai?" na fesili ai Karai.

A o tago atu le lima o Piota i le faailoata, na lafo atu le vaai o ona faalogona i totonu o le ana, ua fālō e tau i ona tapulaa. O le susunuina e taleni gaioia, o

uamea ma sinā latou te le'i mafai ona taofia lona aapa ma pa'i atu. A o galoma lemu atu leo o tagata i ona tua, na ia moulu atu i totonu o le ana pogisa ma aau atu i le fetu susulu e tasi sa totoe ai i totonu, o se fatu tele, se tasi na ia alofa i ai i lona olaga faatamaitiiti atoa.

Na maua atu e Piota o ia o loo faapupuu i totonu o le nofoaafi, sa faaluelue ai. Na ia lafi ese mai mea pueata auā na fai atu ai Piota. O lenei meaola o se vaega o le mamanu. A e mo le taimi nei, e leai se mea e tasi o toe afaina. Ua tiga o ia, e loloto atu nai lo se isi lava taimi muamua. Na o lona mana'o lava ia te ia. Na ia aapa atu i lona fatu matua, ma opoopo lemu le afi ma lafo atu i ai ona alofaaga uma faapea lona mana'o.

Na iloa e le manuki ua i ai le tama ona ia tagitagi lemu lea, ua aapa atu i le ea gaogao. I totonu o le ana pogisa, na la'ua afisi, opoopo ma afifi o le tasi ma le isi, na faasoa o la'u alagona i se tulaga e sili ona loloto nai lo se isi.

O se tasi o la'ua mealilo.

Na iloa e Piota le mea moni i le uluai taimi na la'ua uu lima ai. Na ia iloa le mafuaaga e alolofa ai le toatele o tamaiti ia Marata, na latou o mai ai ia te ia mo se faamafanafanaga, e fetagisi i totonu o ona lima pe tau lava ina ia pa'i atu ma tago atu ia i latou.

Sa i ai lana taleni, sa le'i silafia e i latou na tausia o ia, o se meaalofo malosia o le agalelei, e pei o Piota. O agaga tutusa e lua. Na ala ai ona la tau fai taofi ma natia a la'ua taleni, o le tasi mo le isi.

A e le na o le pau lea o la'ua mea lilo.

Sa i ai ma le isi e pogisa atu, sa afifi i le mata'utia, na fa'aalia i se auala e leai se isi o la'ua e malamalama ai, a e na tau fai iloa e moni. Mai le uluai taimi na la'ua fevaaia'i ai, na la'ua iloa ai, o la'ua e la te feoti faatasi.

Na vaai atu Karai a o masau atu le nofoaafi i le ana agai i le nofoaga o i ai le Gaioiga Saturino. Ua uma na ta'u atu e Monike ia te ia le faamoemoe.

"A o ai o loo i totonu o le nofoaafi?" na ia fesili ai. "E mafai ona tatou fesootai ma i latou?"

Na uu e Monike le lima o le tama a o faamafola ona tamatamailima i luga o le faailoata. "Ou te manatu ua oo i ai Piota i totonu o le nofoaafi. E iloa e le tama ona faaola le nofoaafi."

"A o ai o loo i ai i totonu?"

"O se uo paaga."

I luga o le faailoata o loo fa'aali mai ai le fatu o le Gaioiga Saturino, na vaaia ai le nofoaafi i se tasi pito ma ua taofi ua tu. Na oso ifo i fafo i luma o le nofoaafi se tino pogisa ma oso atu i totonu o le nofoaga.

“O se manuki le mea le la?” na fesili ai Kousalasaki ma laa i tua.

“O le eipi,” na faasa'o atu ai e Rosauro ma le mapuea, ua fiu e faasa'osa'o lenei tamaloa. “O se simipanisee.”

“O Marata,” na fai atu ai Monike.

Na lagona atu e Karai le tiga i totonu o lona leo. O se afā o kasa oona atonu o loo agi ai i totonu. Na minoi lemu le fuatino, maseesee tau pa'ū, maluelue leaga faia, e pei e ma'i.

“O le a le mea o loo ia taumafai e fai?” na fesili Karai.

“O loo ia taumafai e lavea'i i tatou uma,” na tali ai Monike.

Na faatasi pea Piota ia Marata. Na ia tulei atu o ia ia te ia, e le ina ia ufitia pe natia atoatoa, a e ia latalata atu na te fafagaina atu ai i lona malosi, e ta'u atu ia te ia le mea e ao ona fai, ma e lē o totasi na o ia. E faapena foi, na ia iloa i lana vaai e ala atu i mata o le manu, e ala i ona lagona maamaai.

Na iloa e le tama le faaputuga o vai tatafe. Na ia lagona se aasa o loo faavaivaia ma susunuina Marata. Na manogi le ea e pei o ni i'a ua elo ma sa aveva ma faafefe ia i la'ua, o se tatafe o vai pogisa, mai a la'ua miti leaga na faasoa.

E sili atu ona mata'utia nai lo se vaitafe.

A e na la'ua faafetaia'ia faatasi.

Na faataamilo Marata i autafa o le pu sa na foloina le vai ma le galala. E tataua ona taofi le mea lea.

Na o le tasi lava le auala.

Na iloa e Piota ma na ta'u atu ia Marata. Ua uma ona faamatala auilili e Kosesetatio le auala e galulue ai auupega uma nei: e uiga i pomu e faapa, o leitiō o fesootaiga, e faasino i faitotoa silo lapopo'a.

Ua uma foi ona ia ta'u ia Piota e faasino i le liva.

Sa le'i manaomia e Marata se fesoasoani. Na ia iloa atu le laau uamea i tua o se tasi meafaigaluega. E mafai ona ia tapunia faitotoa silo ma taofi le tafe agai i totonu o le fatu o le lalolagi. Na lagona e Piota le tagi lemu o le fefe mai le manu. Na ia lagonaina i lalo ifo o ona lava ivi.

E te mafaia ona fai, Marata...

Na ia tauivi, o lona pa'u ua mu, o ona fulufulu na toulue pei o nila paina, o ona tapulima sa manu'anu'a ina ua fetau ma le palasi ifo o le vai i luga o le papa. Na taofiofi e Piota le mumū o le tino o lana pele ma faamalosi i lona taumafai.

Na taunuu atu Marata i le liva. Sa faasaga latalata i le faitotoa. E manaomia le faatu sa'o i luga. Na ia tuu atu lona tau'au i lalo ifo, tago atu ona lima e lua i le uamea, ma uunai malosi i ona vae.

Sa le'i minoi le uamea.

A o tatafe atu le vai maluu i ona tua, na lagona e Piota le tiga i le tua o le manu, i ona vae, i lona fatu. O aloiafi o le mumū o le manu na feemo i lima o le tama.

Marata...

Peitai sa le'i minoi lava le liva uamea.

Na matamata atu Monike a o taumafai Marata e tulei le liva. Ua vaivai lava. E le'i maluelue le uamea. Na amata ona manavanava malosi Piota, ua na faasoaina le fefe ma le tiga o lana simipanisee matua. “Aisea e lē minoi ai le uamea?” na fesili ai Karai.

“Faamalosi, taumafai pea, lou manuki!” na tauvalaau atu ai Koualasaki.

Na punou faalatalata atili atu Monike, ma tuu atu lona alofilima i le faailoata. Na ia taumafai e manatua le vaaiga na emo i lana vaai talu ai, i totonu o le potu a o ia pasi faanatinati atu. A o ia oono, na taia lona ulu i se tiga maai faaeletise. O ata mai se isi taimi ma se isi nofoaga ua tuanai na toe emoemo mai.

...o se tamaloa na ufitia i le lanu o koale...o se malaga faatitafatō i se taavale koale...o se mataataata pa'epa'e agai i se pa'u pefua...o se tama!.. e pei lava, o Tamā...

Ona toe mou ese lea.

Sa tauivi Monike e taofi mai se mea, peitai e pei o se miti pe a ala mai, o le manatua e amata ona liu suavai ma tafe ese i ona tamatamailima. Aisea na oso a'e ai lea manatua faapitoa? Mata o loo tanumia ai i totonu se mea tāua.

A o faasolo galoma atu le manatua, na ia vaaia le ata o le tamaloa sa lilofia lona tino i le koale, o loo ia taofia ma faalēmū le taavale koale e ala i lona oomi o le ...

“Taofi lima! Toso le taofi lima!” Na ia faataiō atu ai. Na ia toe tepa i tua i le autilo puupuu i le nofoaga o eliga maina. Na ia vaaia le liva. Sa i ai le oomi i lona faatausi'usi'uga.

Na liliu atu Monike ia Piota. Na ia punou atu ma musumusu i lona taliga. “E tataua ona oo Marata i le faatausi'usi'uga o le liva. E tataua ona ia oomi lona 'au. Ona minoi ai lea mo ia.”

Na fa'aauau pea le silaloa o Piota, pei e taligatuli i ana upu, ma e leiloa lava pe moni sa le'i lagonaina e le tama. Na taumafai Monike ina ia faalogo mai le tama ia te ia.

Sa pei e malamalama Rosauro i atugaluga o Monike, ona laa atu lea o le fafine i ona autafa. “E faapefea ona la fesoota’i? O se auala faatelevave fauaaealesi?” “E leai. Ou te manatu o se auala faa-emepatia. E faasoa i faalogona. Ua ou vaai soo o fai e le tama le mea lea i le manuki. E ui ina sa le’i vava mamao faapenei muamua.”

“O lona uiga e tataua la ona e fesootai oe i ai i le tama i le auala lena.”

Na pupula atu Monike i le fafine, e peisea’i o se tagata ua leaga le mafaufau.

Na fai atu Karai. “O Rosauro e atamai faapitoa i mataupu tau neuria o le tagata. Faalogo ia te ia.”

Na fai atu faagesegese le fafine. “O le emepatia e faasino lea i faalogona ma le lagonaina i le pa’i. Atonu e te mafaia foi ona pa’i atu ia i la’ua i le auala lena. Ofo atu i ai se mea e faamafanafana ai. E mafai ai ona matala se auala.”

Na vaaia faata e Monike ia Piota ma Marata. Na la’ua fepa’ia’i soo, tago atu le tasi i le isi, milimili, opoopo le tasi i le isi, a e na manatua ai e Monike le mea e sili na maitauina e mafanafana ai ma saogalemu le tama.

O le taimi lava lena na ia opoopo ai ona lima faataamilo i le tino o Piota, e pei ona sa ia masani ona vaaia o fai e Marata. Na lagonaina e Monike le ta ta o le fatu o le tama ua saosaoa e pei o se manutagi. Na ia tago atu ua luelue malie le tama, ona musumusu atu lea i lona taliga i le mea e tataua ona fai.

Na ia momoli atu atoa ma lona fatu atoa.

Oomi le taofi lima...

Na faatasi pea Piota ia Marata a o ia taumafai atu i le liva – ona ia lagonaina lea o se mafanafana e masani ai o pa’i mai i ona tua. Na ia tepa a’e i ona tauau ma ia maua ai se fatu lototele iina, o faamu ai se aloiafi malosi. Na ia pulatoa i totonu o le afi ma lagona ai le mea e ao ona fai e pei ona sa ia faalogo atu ai.

Na ia toe faasaga atu i tua ia Marata ma pipii atu ia te ia, ma faailoa atu foi ina ia na iloina.

Peitai o lana uo sa na o le gatete ma mu, ua faasolo ina vaivai.

Faamolemole...

Na ia tagitagi, ua fefe, peitai o se tasi o ona lima lapopoa na sosolo atu i le liva ma na maua ai le taofilima iina. Na opoopo ai ona tamatamailima uumi, sa faataamilo ma ia oomi loa. Na ia toe uunai malosi, o ona tauau i le liva ma tulei i ona vae.

Na minoi le liva, ae sa mamafa pea. O ona itu sa gatete, na ia uunai faatu sa’o ai i luga ma toe uunai i tua. Sa i ai se mea na gapā leotele.

Na lagona le pa’ō o ni kia ua tasui.

O Marata na solofa ifo i lalo, ua vaivai ma tigaina.

“Ua mafai ona ia faia!” o Karai lea.

I luga o le faailoata, na iloa atu ai o le pus a i le fola ua amata ona mapuni, ua taofi ese ai le tafe o le vai i se uamea. O le vaitafe ua le toe mafai ona tafe i lalo, na faatumulia ai totonu o le fale maina.

Na tafea ese le manuki i fafo o le potu ma agai atu i totonu o le ana, peitai sa faateleina pea le vai e mulimuli atu. E ui ina sa tauau ina uma lona malosi ma mu, ae sa mafai ona ia toe tu i luga ma suigi atu i luga o le taavale o le nofoaafi. A o siitia a’e le vai uliuli i ona autafa, na ia faalue solo atu i luga o le taualuga, o faailoa se auala o le atuatuvaale ma le puapuagatia.

Na lagona e le fatu o Karai le alofa i le meaola.

“Ave ese mai le la manuki mai le la nofoaga!” na tauvalaau atu ai Koualasaki. Na ia tu’i atu lona lima i le faailoata ua ta’e.

Peitai, sa leai se mea latou te mafaia. Na tapuni faitotoa ua mau, ma le vai sa faatumulia ai le ana, o ona itu uma sa faamauiina. E tusa lava pe mafai ona latou tatala faitotoa, a o le maualuga o le kasa oona e fasiotia ai i latou. Ma o le iuga, ua leva ona aafia le manuki i aafiaga o kasa oona mata’utia.

Na faliu ese Rosauro ma u i ai lona tua, o uu lona gutu i lona popolega.

I le faaiuga, na nofo ifo i lalo le manuki matua, saofai ma opopo ona tulivae. Ma amata ona ia faaluelue malie. Na ia iloa lelei le mea o le a soso’o.

Na opoopo mai e Monike le tama, o se loimata e tasi na maligi ifo i lona alafau.

I totonu o ona lima, na faalue ai foi le tama ia, e taga tutusa lelei ma le lue a lana uo i totonu o le ana.

Na faatasi pea Piota ia Marata a o siisii pea le vai. O le fatu o le manu sa feemoemoa’i ma faataavili solo i le fefe. Ua leva ona ia iloa o le vai uliuli o le a ia fasiotia o ia. Ua taofi nei o ia e Piota, e pei ona sa ia faia i le tele o taimi ua tuanai. Na opoopo e le tama ona lima ma fusi mau atu ia te ia. Ona la fusifusi opoopo ma faaluelue ai lea mo le tasimi mulimuli, e lua fatu na faasoaina le afi mumū e tasi.

Na iloa foi e Marata le mealilo a le tama.

Na ia tagitagi malie ma faalagolago lona alafau ia te ia.

Piota...

Ou te alofa ia te oe, Marata...

A o siitia a'e le vai e ufitia ai lana uo, na vaai atu Piota i le sami pogisa na ufitia ai o ia, na susulu ma le fitusefulu ma le fitu malamalama iila, o taavilivili faataamilo i se afi e sili atu le malamalama o lona lava fatu. O se tasi o ana faiaoga sa ta'uina atu ia te ia le auala e faataamilo ai paneta i autafa o le la, o loo maileia i totonu o latou taamilosaga.

Na ia malamalama.

Na ia iloa i lona faopuuina o na fetu na te le mafai ai lava ona tuu atu i latou e o. E le o se miti leaga lenei, na te gaoia ai na o sina vaega itiiti o latou agavaa. Ua ia laasia le laina o le lē toe foi. A o ia faatau pupula atu, na ia iloa atu na malamalama gaoia o fai ifo malie lo latou pupula. O ia o loo susunuina i latou, o faaumatia ana uo, lona tuafafine.

E na o le tasi lava le auala e faamatuu atu ai i latou.

O le isi auala na ia sau ai ia Marata.

Na ia manomia o ia.

Piota...leai...

E tatau ia te oe...

Na ia lagonaina ona lima o tago atu i le malamalama manino i totonu o lona sami pogisa. O ona tamatamailima uumi mafanafana na afifi faataamilo i lona lava fatu.

Piota...

Peitai na ia iloa. Mo isi ina ia ola, e tasi lava le auala. O isi na maileia i totonu o lona faataamilosaga, ma pe afai e tuu ai pea, o le a ia mu i totonu o i latou uma. Na pau le auala e faasaoloto ai i latou o ave ese o le la na taofia i latou. O fetu o le a mafai ona toe felelei i tua ma toe foi i lo latou faasinomaga.

O lea na oomi ai e Marata ma saga oomi ai a o si'i a'e le vai pogisa faataamilo ia te ia. O lona taula'i i le tama, ua na le toe fefe. A o la'ua faalua, na tapuni tamatamailima o le manu, a e na tiga pea.

I sina taimi puupuu lava i le lumana'i ai, a o le'i mate atoatoa le malamalama o Piota, na ia tago atu ai i se fetu e tasi i lena sami pogisa, o loo pupula manino e sili atu nai lo isi.

Sasa, na ia musumusu atu ma ta'u i lona tuafafine se mea lilo.

Na faafuase'i ona galemu le tama i totonu o ona lima. O lona lima itiiti na pa'ū ese mai le faailoata. Na ia iloa atu le tino o Marata ua tafea ese mai luga o le nofoaafi ma taavilivili ese atu i totonu o le pogisa o le ana.

Na tuutuu ifo e Monike le tama i le fola. "Piota?"

Na faatau pupula tauaso a'e le tama i le taualuga, o pupula o ona mata ua nenefu. Na siaki e Monike i

uaia o lona tino ma ona musela poo ola. Na ia maua se tasi e ui ina vaivai. Na manavanava i luga ma lalo le fatafata.

O luga atu, na lagona atu ai leo o le fetagisi ma le feoi. O isi tamaiti. Ua feala mai, ma iloa se potu o loo tumu i tino oti.

Na faasino atu Karai. "Rosauo, Koualasaki, o i luga ma fesoasoani i tamaiti!"

Na tepa atu Monike i fuatino mai le isi taufaasi'usi'uga o le ana. Na ia vaaia tamaiti o feminoia'i solo, o isi ua tu tu i luga. Na ia vaaia Konesetatino o fesoasoani e faanofa i luga Kisika. O loo lelei.

"E faapefea le tama?" na fesili ai Karai.

Na nofo Monike i luga o le fola ma sii luelue le tino pae o le tama. O Piota na manavanava, o lona toto sa pamupamu, peitai o Monike na faataupupula i totonu o ona mata silaloa ma iloa ua alu le tama.

Piota...aisea?

Na faatasi atu Karai ma tuu lona lima i lona tauau. "Atonu o le te'i. Atonu e i ai se taimi..."

Na faafetaia e Monike le faamalosi faatupu faamoemoe, peitai na ia iloa le meamoni. A o ia taofia le tama, na ia lagonaina le faamatuu atu o le tamaitiiti. Na toe foi mai le vaai a Monike i le faailoata o tumu i tamaiti o fegaoioia'i ai. Na iloa e Monike. O Piota ua faaositaulaga lona ola mo i latou, mo ona uso ma tuafafine uma.

Na mapu ane Karai i autafa o Monike, ma la'ua tau fai mataala.

O le tagata ese e foliga mai o se tagata lelei, ma i lenei taimi paganoa na o i laua, na lagona e Monike se ituaiga mafanafana ese i autafa o le tamaloa. E le o se manatuaga, na o se faalogona e mafai ona tuu ese lona popolega aunoa ma se fefe e lē afaina.

O lea sa le'i toe ma ai o ia a o tafe sisina ifo ona loimata, ma na toe luelue ma sii Piota i ona lima mo le taimi mulimuli, o le taimi nei ua na o se atigi tagata.

28 Setema, 4.21 afiafi

Uosigitone.

Na kolosi atu Paineta ala atu i faaputuga faleie ma taavale toso na usitia ai le Faletele o le atunuu. O le tolauapiga o le au Kipisi na faatumulia ai le fanua o mutiā ma laina uumi o vao i le lotoā o le Faletele. O faleie na fefiloi ai fausaga tuai na fausia i uamea e tutu'i i le palapala ma ufiufi i ie, ma ituaiga faaonaponei, e fou aumai i faleoloa o mea tau taaloga. E faapena foi le eseese o ituaiga taavale toso, mai

fausaga faigofie e oo i fale tetele ma o latou tainafi o loo faatu i luga o uili uumi ua vali.

Ua o mai uma le au Romani mai itu eseese o le lalolagi i lenei faatasiga. O solofanua sa nonoa i fale na fausia, o tamaiti sa fetamo'ea'i solo, o musika na ta, ma le leo o taliega na faalogoina. Ma sa gasolo mai pea le toatele.

Sa i ai le sauniga o le faafetai a le Peresetene na fuafua mo le faaiuga o le vaiaso. E leai se mea tusa ma le lavea'iina o le ola o se tasi, e tuuina atu ai le faamalo ma le faafetai. A e le taulia ai le lavea'iina o le lalolagi.

Na mulimuli atu Paineta i se auala ui atu i faaputuga gaogaosa'a o ou solo taifau ma tamaiti na taape ese ma le auala. Sa faapea foi ona faaoga faatasi e tagata tafafao le auala pi'opi'o o alia ma pasā vaapiapi, o faatau ni tautaliga, o suesue ma faamatala o latou lumana'i, pe na o le silasila ma maimoa solo.

Na tepa a'e Paineta i le Maafaamanatu o Uosigitone ina ia fesoasoani e faasa'osa'o ai lona auala.

Na ia taamilo atu i se tulimanu, ona matala mai lea o se avanoa mo ia, o i ai se tasi o taavale toso teuteuina aupito sili ona lapo'a ma le matagofie. O ona faitotoa laupapa sa matala. Na iloa atu e Paineta se aiga mafanafana o i ai se moega lautele o siitia, o kapeneta vali mananaia ma teuteu lanu samasama ma mūmū. Sa i ai foi se ogaumu laititi na vanevane ai ona teuteu. I luga o fasitepu e taunuu atu ai i le taavaleto, na maua atu ai e Paineta ia Luka o nofonofō mai ma Karai, o loloto a la'ua talanoaga. O le lima o le taitai'au sa tautau pea i le fusi. O nai sitepu e va ese ai, sa fai ai taaloga o le ta to'i, a Sei Rosauo ma se vaega o le au Kipisi. O se tasi o lau o le to'i na lele a'e i le 'ea ma tau tonu i le mata-o le-povi, na taia ma mamulu ese ai le naifi a le isi itu. Mai la latou tauvalaau mo se lavea'i, e iloa ai o le tamaitai sa malosi ma manumalo.

O le isi itu, na faateia ai Paineta i le vaai atu ia Elisapeta ma Koualasaki. O le fafine e pei faato'a taunuu mai Initia e auai i le sauniga. Sa galulue faatasi o ia ma le au tusitala Romani o le faasolopito faapea tagata Initia eli faamaumauga o le vavau, ina ia 'eli a'e i luga faamaumauga o le nofoaga o le malumalu Eleni o loo ua faatumulia saisai.

Na vaai atu Paineta i le itu taumatau ma iloa atu se fu'a faalauiloa i lumafale o le Falemataaga o Tala Faasolopito o le Natura. Na faalauiloa mai ai le ata o se malumalu o mauga Eleni o loo i ai ma se mataitusi

episilona lapo'a i le ogatotonu, o faasilasila mai ai le tapenaga o le faalauiloaina o le Perofeta o Telefai. Talu ai le tele o faasalalauga ma faalauiloa faalauaitale e faasino i le sailiiliga ua maua i le eliga i luga o lenei malumalu, na faatau atu ai ma taulia uma pepa ulufale i masina ua te'a, o le tele na faatau e le au Kipisi o iinei, o loo naunau e fia sailiili atili ma iloa le talaaga o latou tagata.

Na iloa atu e Luka le taunuu mai o Paineta ona ia tu lea. O le tamaloa Kipisi na laei ona ofuvae lusi ma se fusipa'u mafiafia fetui ma ona seevae, ma sona peleue vesi matala i luga a'e o se ofutino lima uumi. "A, lau afioga Faatonu Koloue! Talofa lava! Maliu maia!"

Na ofo atu e Paineta le punou o lona ulu i le taitai o le vaegaau. "*Naise Tuke*," na ia faafetai atu ai i le gagana Romani.

Na tu foi i luga Karai. E pei o Koualasaki, o le ta'ita'i sa laei faasamasamanoa i lona ofuvae ma se peleue māmā.

I aso ua tuana'i, na latou masani ona o mai ai iinei. O ni nai vaiaso sa umi a o feagai ma toe sauniga ma fonotaga matautia. O Paineta sa tafafao mai iinei ma Lisa toetoe lava o po uma. Sa savalivali solo i le tolaupiga, o fusifusi, e le'i talanoa, a e sa faalogologo i pesega ma taliega a o la'ua sopolia aiga o potopoto i autafa o taumafataga faamalamalama e moliga'o. Na lagona e Paineta le mafanafana i lenei vaaiga o se faamanatu manino i le atoatoa o le soifuaga. Na ia mauaina foi e ala i pese ma leo o le taliē fiafia, faamanatuga o lona olaga a o laititi, i aso fiafia i luga o nofoaga faasao o Masanatukeyi. Na pei lava le lagona ua ia alu i lona aiga...pe afai na o sina taimi. Peitai o le faatasiga i le asō, e sili atu ona aloaia ma moni lona tino mai.

Na latou agai uma i se laulau sa avanoa lata ane. O ni solofanua e lua sa nonoa latalata ane.

A o latou nonofo ifo, na fesili Karai, "Ia, na faapefea la taualumaga o le fonosai fai?"

Na pupula malosi atu Luka ia te ia i mata malamalama.

O Paineta faato'a foi mai i se fonosai ma sui mai le malo Amerika, o le amepasa Rusia, ma nisi faalapopotoga mo tamaiti. O le tulaga i tamaiti e to'a fitusefulu fitu le auga o lea fonotaga. Sa tele ni mataupu ma talanoaga faasaga ia i latou.

"Na fiafia le au Rusia ma malilie e lafo mai le pule ia i tatou," na amata atu ai Paineta. "Ua lava a latou faafitauli o loo fia fufulu e pei ona i ai..."

(sosoo atu i le Sulu Samoa Fepuari)

O LAU AFIOGA O LE SULU LEA...& MALAMALAMA

Faamalologa pe a faamanu'alia

“E faamaloloina e ia e ua loto momomo; e fufusi e ia o latou manu'a” Salamo 147:3

E i ai taimi o le soifuaga nei, tatou te fetaia'i ai ma ituaiga tiga eseese, e pei o sauaga, o le teena ma lē amanaiaina, e faalataina, ma ituaiga tiga eseese ona o mea leaga e faia e isi tagata ia i tatou. Peitai afai tatou te taofiofi pea i ai i nei mea leaga ma nei tagata, o le a tatou tumau ai pea i lagona ma tulaga o le ita, faanoanoa ma le tiga. O le upu moni, pe afai tatou te mumusu e faamagalo, e faagalo ma aga'i ai pea i luma, o le a tatou tuu se auupega malosi i lima o Satani na te fa'aaoga ai, e saga faatigaina ai i tatou i soo se avanoa e maua. O le mea e sili ona faataua iinei, e lē o le faafitauli ua tupu ia i tatou, a o le auala tatou te faafetaia'i ai ma tali atu ai i nei tiga.

Pe afai tatou te tuu i o tatou tiga latou te pulea o tatou mafau fau ma lagona, ona latou faatonutonu mai lea o tatou loto ma gaioiga uma. E lē finagalo Iesu ina ia tatou ola i se olaga faapea – ina ia tatou saga amo ma tauave pea ni avega o tiga talu ni manu'a o mea ua te'a ma ua leva ona tutupu; e finagalo o Ia ina ia faamalolo i tatou. O le ala lena ua Ia aumai ai ana folafolaga tāua i lana Afioaga Paia. Pe o le a lava le ogaoga o tatou manu'a ma ona tiga, o loo i le Atua i taimi uma i Lona finagalo, le toe faafoisia o lo tatou manuia ma le filemu e tatau ai. *“¹⁷Auā ou te faamaloloina oe, ou te fofōina ou manu'a, o loo fetalai mai ai le Alii.” Iere.30.*

Pe afai ua loa tausaga o e tauivi pea ma ni manu'a poo gasegase faaleagaga e lē matogafitia ma faigata ona aveese, o lea ua leva ona saunia e le Atua le auala e mafai ai. *“E faamaloloina e ia e ua loto momomo; e fufusi e ia o latou manu'a”* A o i ai Iesu i le lalolagi nei, na Ia faamalolo i manu'a ma tiga o soo se tagata sa sulufa'i atu ia te Ia, ma faamafanafana i o latou faanoanoaga. Ma ina ua tuua e Ia lenei lalolagi, na te le'i tuulafoa'i i tatou auā na Ia silafia, tatou te fetaia'i pea ma lenei faafitauli o tiga ma faanoanoaga. Na Ia auina mai le puna o mafanafanaga e faavavau ina ia soifua i totonu o i tatou taitoatasi – o le Agaga Paia, lo tatou Fesoasoani Sili, o le uo e sili ona latalata mai. *“¹⁶Ou te fai atu foi i le Tamā, ona foai mai ai lea e Ia ia te outou le tasi Fesoasoani, ina ia tumau pea o Ia ia te outou e faavavau. ¹⁷O Ia o le Agaga o le upu*

moni, e lē mafai e le lalolagi ona talia o Ia; auā ua lē vaaia o Ia, ua lē iloa foi o Ia; a o outou, ua outou iloa o Ia, auā e tumau pea Ia ia te outou, e i ai foi o Ia i totonu ia te outou.” Ioa.14.

O tiga ma mafatiaga sa maua ai i tatou, o lagona e moni lona tino mai ma ona faalogona, peitai e lē finagalo le Atua ina ia avea na tiga o le mea e sili ona moni; a o lona Agaga e i ai i totonu o i tatou ma e lē tuulafoa'i ina i tatou i se taimi, o le mea moni aupito sili lea ona malosi lona pa'i mai. *“⁵Auā ua fetalai mai o Ia, 'Ou te le tuua lava oe, ou te le tuulafoai lava ia te oe. ⁶O le mea lea tatou te mafai ai ona fai atu ma le loto tele, O le Alii o lo'u fesoasoani ia, ou te le fefe lava i se mea e faia e tagata ia te a'u.” Epe. 13.* Ma ua mafai ona tatou utuvai ma mitiia mai lona malosi i taimi uma tatou te tiga ma mafatia ai, ma maua ai le mafanafana ma le filemu pe a sousou la tatou folauga nei.

O a tatou mea a fai i le lagi?

“²¹Ou te tofia oe e pule i mea e tele; ina ulufale mai ia i le fiasia o lou Alii.” Mata 25.

Pe afai o oe o se tagata e naunau e galue i taimi uma, ma fiasia e faatino fuafuaga lelei a o i ai i lenei lalolagi, o se tagata foi e lē mana'o e malolo mo sina taimi, e le mana'o e 'iva le aso, o lona uiga e te lē talia gofie se mafaua faapea a uma lenei olaga, ae oo i le ola faavavau, na o le malolo lava ma eva i le laufau malu le mea e fai i le lagi. Peitai, e leai se mea faapena o le a tupu. E tusa ma le faataoto a Iesu i lona uiga loloto tau le Malo o le Atua, pe afai tatou te taunuu atu i le lagi, e lē faapea mai le Atua lo tatou Matai, Ua lelei ia, le auauna lelei e, ma le faamaoni, ua e faamaoni i nai mea itiiti, ina mapu atu ia oe ma malolo ma le filemu e faavavau. E leai, a e faapea mai o Ia, *“²¹Ua lelei ia, le auauna lelei e, ma le faamaoni, ua e faamaoni i nai mea iti, ou te tofia oe e **pule i mea e tele.**” Mata. 25.* O le a **tele mea** e tofia i ai i tatou e fai. O le upu moni o le a tatou pule faatasi ma Keriso i lenei lalolagi toefuata'i ina i lana pule faatupu faameleniuma (Fa'aaliga 20:6). Ma o loo molimau mai le Fa'aaliga 22, *“³E i ai foi le nofoalii o le Atua ma le Tamai Mamoe, o ana auauna foi latou te auauna ia te ia.”* O le Atua e le gata ina Ia saunia se nofoaga mo i tatou taitoatasi, a e na te saunia foi se fuafuaga ma le faatautu lelei mo i

tatou. O le mafuaaga lea e lē 'iva ai le lagi, ona e lē 'iva'ivā le Atua! O la le fatupese 16: *"¹¹E te faailoa mai ia te a'u le ala o le ola; o i ou luma le fiafia e malie ai; o i lou itu taumatau le olioli e faavavau."* Talu ai ona o le a tatou mafuta faatasi ma le Atua, o mea uma o le a tatou faia o le a aumaia le olioli ma le fiafia ma le faamalieina atoatoa. O nisi faaliliuga o le Failauga 3:11 e faapea, *Ua tuuina foi e Ia le faavavau i o tatou loto.* O lona uiga, ua uma ona foafoa e le Atua i totonu o i tatou, se avanoa e le mafai ona faamalieina i se isi lava mea vaganā le lagi. E le mafai ona tatou iloa ma malamalama i mea uma ua saunia e lo tatou Atua mo i tatou i lo tatou aiga ma le nofoaga i le lagi. Ma e le mafai ona tatou toe fausia pe toe foafoaina le lagi i laufanua o le lalolagi. Peitai pe afai tatou te filifili ina ia saunia i tatou mo lo tatou aiga faavavau o faatali mai, ona suia lea o lo tatou faamamafa i mea faalelalolagi, i se soifuaga e faafiafia ai le finagalo o le Atua, e malie ai o Ia ma faapaiaina ai lona suafa, ma ia faapea foi ona faaliliuina ai loto o nisi tagata ia te Ia. Ma faateleina ai lona viiga e faavavau.

Feutaga'i ma le Atua i mea uma

"¹⁴Ua latou lē fesili atu i le Alii." Iosua 9.

Ia e ola ma le tasi taliga faasaga i le lagi: "O se avanoa lenei mai ia te oe, le Atua e?" "O e auai ma lagolagoina lenei mataupu, le Alii e?" "Ou te savalia lenei auala ua i o'u luma pe leai, lo'u Atua e?" O nisi ia o ituaiga fesili e feutaga'i ai ma le Atua, ina ia mautinoa o auai o Ia ma lagolagoina soo se mataupu o loo e aafia ai. E i ai le taimi na lape ai le fuafuaga a Iosua, na te le'i fesili i le Atua, ma faia ai sana faai'uga na iloa mulimuli le sesē ma le faaletonu. A faitau i le tala (Iosua 9), e iloa ai se vaega o tagata mai Kipeona, na o ane i le togalauapi a Isaraelu ma fai ane, *"⁹O le nuu matuā mamao lava ua o mai ai au auauna, ona o le suafa o le Alii lou Atua."* O tagata nei sa malamalama lelei i tulafono a le Atua, mo Isaraelu ma tagata e i fafo atu o Kanana, o aiaiga ma tuutuuga e pei ona ta'ua i le Teute.20: 10–12. Soo se aai e mana'o e fai le leleiga o le a faapea lava ona faasao, a e o le a auauna ma fai taulaga ia Isaraelu. O lea na o ane ai Kipeona ua fai le togafiti faa'ole'ole, ina ua fefefe ia Isaraelu. A o le tolu o aso mulimuli ane, na iloa ai e Iosua ua faasesēina o ia. O tagata nei o loo latou tuaoi, e na o se aso e tasi e savalia ai le va ma i latou. Ma o le i'uga o lenei

mataupu, na fai ai le feagaiga a Isaraelu ma lenei fili, ua faasaoina i latou, talu talu ai lo latou lē fesili muamua i le Atua. Ma o se a'oa'oga lelei foi lea mo i tatou, mai le lape o Iosua.

O lo tatou fili e saili auala e ulufale faafoliga mai i o tatou togalauapi, auā e faitogafiti poto ma pepelo o ia. *"¹⁴E le se mea foi lea e ofo ai, auā o Satani lava, ua liua o ia e ia ma agelu o le malamalama."* 2 Kori.11. 'Aua tatou te faatamalama pe manatu māmā i soo se taimi, auā e lē mapu le fili saili mai sona avanoa. O le mea lea e tāua ai le feutaga'i ma le Atua i mea uma. I soo se magaala ma soo se filifiliga e fai, fesili ia te Ia, e faasino mai poo fea le itu e tataua ona ui ai, i le taumatau po o le agavale. Fai mai Tavita, *"¹⁰⁵O lau afioga o le sulu lea i o'u vae,"* a o savali i le taimi nei, ae lē tau o se sulu mo a taeao. E lava ma totoe le malamalama na te aumai, ina ia tatou iloa tonu le isi sitepu e sosoo ai. Pe a tatou tatalo, na te fetalai mai i o tatou loto: *"²¹E faalogo foi o outou taliga i le upu i o outou tua, pe a outou afe ane i le itu taumatau pe afe ane i le itu tauagavale, e faapea mai, O le ala lava lenei, ia outou savavali ai."* Isa 30. O le upu faamamafa iinei, ia feutaga'i ma le Atua i mea uma.

Saoloto mai le luma o le tuana'i

"⁹O le aso nei ua ou aveeseina ai le luma o Aikupito ia te outou." Iosua 5.

Na aveese faasaoloto e le Atua Isaraelu mai Aikupito i le aso e tasi, peitai e fasefulu tausaga le umi na aveese ai le luma o Aikupito mai ia Isaraelu. Na tupu lea mea i Kilikala, pe a ma le 380 maila i le itu matusasa'e o Aikupito. O Isaraelu na mafaufau manatunatu ma ola e pei o pologa. Na faasaoloto i le esoto. Peitai, o lo latou taunuu i Kilikala na latou faato'a mafai ai ona lafoa'i le tuana'i i le tuana'i. *"⁹Ona fetalai mai ai lea o le Alii ia Iosua, O le aso nei ua ou aveeseina ai le luma o Aikupito ia te outou."*

Mo nisi o i tatou, e faitau tausaga faato'ā tapunia ai lagona o le faasalaina, ma faate'a ese le tuana'i mai o tatou olaga o le taimi nei. A o le Tala Lelei, e mafai e le Atua ona faate'a ese o tatou luma o aso ua te'a. *"¹O lenei, ua leai (nei) se faasala i e o ia Keriso Iesu."* Roma 8. O le **taimi nei**. O lo tatou faamagaloga, ua atoatoa, ma o le mea moni, ua tupu i le taimi nei, iinei. Afai o oe ua ia Keriso, e lē toe (*faauma itulau 15*)

O E UA MALILIU
TA'ELEIVAIMANINO TAUĀ
LUA'IPOU TAUĀ'I POASA
FAAFEŪ

17 Iulai 1966 - 1 Ianuari 2026.

O le Afioga i le Tiakono ia Ta'eleivaimanino Poasa, o le EFKS Moataa, na soifua mai i le Aso Sa, 17 Iulai 1966. O ona tua'ā o Tauā Fumataga (Lalomanu) ma Ruta Ioapo (Moata'a). Na fa'aipoipo atu ia Mafutaga Palepua i le Aso 11 o Me 1988. Na faae'etia lo la tofi Tiakono i le Aso 31 o Me 2004. Na maliliu lona faletua, le tinā ia Mafutaga i le Aso 7 o Novema 2018, ae fa'aaau pea ona galue le tamā Tiakono ia Ta'ele, e tautua le Galuega a le Atua e ala i lana matāfale ma lona tofi Tiakono. E to'afā nai ona Alo. Ui lava o lea, e leai sē fai loto i le pule fai toatasi a lo tatou Tamā i le Lagi, ina ua maliliu o ia i le ulua'i aso o le Tausaga Fou, Aso Tofi, 1 Ianuari 2026, i le atoa ai o le 59 tausaga, 5 masina ma aso e 16 o lona soifua.

E 22 tausaga sa auauna ai i lona tofi Tiakono; e ala i le tautūina o le Faamanatuga, o le faia o monotaga fa'alelotu e pei ona masani ai, ae tainane o lona soifua Faitaulaga. E le gata i lea, a o galuega fa'aleleia i le lotoifale o le Ekalesia, e pei o le Malumalu, o le Hall ma le Maota o le Fa'afeagaiga. O se sui iloga o le Autalavou, i taimi o lona taule'ale'a, sa galulue faatasi ai ma le to'atele o tupulaga talavou, i le atina'eina o lea itutino o le Galuega. E ui i le tele o ona tuatuaiga ona o galuega a le Malo sa galue ai, ae sa le tuua ai lona tofi Tiakono i le Ekalesia. O le sui auai foi o le matou Aufaipese i tausaga ua mavae, auā o le tasi lea o taleni sa ia te ia, i le galuega fa'aAsafo.

O lona Sauniga Fa'aleAiga sa ta'ita'ia e le Susuga i le Toeaina Fa'atonu, ia Rev. Taise Ioapo (FT/ Fa'atonu), i le Aso Gafua 12 o Ianuari 2026, i le Fale Maliu o Pa'u Sefo Pa'u. Sa saunoa foi le Susuga i le Toeaina Fa'atonu i le Upu Faamafanafana auā le fanau, ae tainane foi o se Upu faala'ei'au mo si o latou Aiga potopoto.

O le taeao segisegi (6:00am) o le Aso Lulu 14 o Ianuari 2026, sa molimoli mai ai lona tino maliu mai i le Falemaliu, ma mapu atu i lona Aiga i Moataa (Tuvao). Sa faatino ai Sauniga amata o le tamā Tiakono. O le Susuga i le A'oa'o Fesoasoani ia Tofaeono Iupati (AF) sa saunia le tatalo. O le A'oa'o Fesoasoani ia Fofogafā Filipo (AF) sa faitauina le Tusi Paia (Isaia 57:10-15). O le Susuga i le A'oa'o Faau'u mai le Kolisi i Malua, o Roseti Imo (AM) sa

saunia le Lauga, e tōmata ai le fanau ma le aiga faanoanoa, i le manatu autū: *'O le oti o le tagata amiotonu'.*

I le itula e 10:00am o le Aso Lulu lava lea (14/1/2026), sa ou ta'ita'ia ai ona Toe Sauniga, atoa ai ma le Lauga Faamafanafana, i le manatu autū o le aso: *"Fa'aamuia, masima ma le malamalama"*. Na fa'aulufale e le Susuga ia Vaueli Sanerivi (FS) le Tino Maliu o le Afioga i le Tiakono. O le A'oa'o Fesoasoani ia Fofogafā Filipo (AF) sa ia faitauina le Tusi Paia (Mataio 5:13-16). O Talosaga sa saunia e le Susuga ia Ieti Solipō (FS). Ina ua mae'a le Lotu, sa molimoli atu le Sā o lana auauna i lona oliolisaga tumau, i lona aiga i Moataa (Tuvao).

Sa ou faia le Lotu faai'u i luga o le tuugamau ma matou faatofā atu ai i le Afioga i le Tiakono ia Ta'eleivaimanino Poasa, i le lagiina o le Pese 268: *"Talofa uso e, tofāina oe"*. Ia manuia lau Malaga, e le galo lou alofa, tausī Faife'au ma au galuega lelei, ma ia fai lea ma viiga o le Atua. O la le Tusi Paia: *"Amuia ē ua oti, o ē ua oti o i le Alii e amata i nei ona po ...ina ia latou malolo i a latou galuega tiga; auā foi o ā latou galuega e mulimuli ia te i latou"* (Fa'aaliga 14:13).

Saunia susuga Semikueva Fa'atoafe (FS)
Fa'afeagaiga EFKS Moata'a,
Pulega Vaimauga Sisifo,
MATAGALUEGA VAIMAUGA.

Saoloto mai le luma o le tuana'i
(mai le itulau 14)

faamatalaina oe i mea sesē sa e faia; a ua faamatalaina lou olaga i le mea lelei ma sa'o ua faia e Keriso, ua fai mou sui. Ua avea oe ma tagata fou, o le foafoaga fou, peitai e umi se taimi e te taliaina ai lou natura fou. Na afio mai Iesu ina ia tuu o tatou ananafi i tuā, tia'i o tatou tuana'i i le mea e tuu ai – o le tuana'i. Ma tuu ai loa iina. E faapefea ona fai? Ina ua e vaai ifo ia te oe e pei ona silasila mai le Atua ia te oe – o le tagata ua ta'uamiotonuina. *"Aua o le na le iloa le agasala, na faia o ia e le Atua ma agasala, mo i tatou; ina ia avea i tatou ma amiotonu a le Atua ia te ia"* (2 Kori.5:21). Nai lo lou saga vaai ia te oe o loo ofu i le masiasi ma le faalumaina, ia amata nei ona vaai ifo e tusa ona silasila mai le Atua ia te oe: o le tagata o loo ofu i le amiotonu o Keriso.

(F. Tolua)

ATA O E UA MALILIU

SUSUGA LALE IEREMIA FT
TOEAINA PENISIONE
TAITAIFONO FONO TELE



TAELEIVAIMANINO TAUĀ
LUAIPOU TAUĀ'I POASA
FAAFEU



(Nisi o ata o le Susuga Lale Ieremia FT, i le mafutaga ma le Faletua ia Tifilelei ma le Fanau